

Visoki predstavnik pozvao direktora policije Republike Srpske da javno povuče komentare

Visoki predstavnik pozvao je danas direktora policije Republike Srpske Dragomira Andana da javno povuče komentare koje je dao na konferenciji za štampu održanoj 10. maja, te da se jasno obaveže građanima BiH da se takav incident nikada više neće ponoviti.

U pismu upućenom gospodinu Andanu, visoki predstavnik je izrazio duboku zabrinutost zbog zaključaka danas objavljenog izvještaja EUPM-a. Komesar EUPM-a Kevin Carty izdao je instrukcije svome osoblju da provedu istragu o tvrdnjama koje je Andan iznio, da su upaljači za eksplozivne naprave korištene u bombaškim napadima na vozove u Madridu 2004. godine proizvedeni u BiH.

“Veoma sam zabrinut zbog zaključaka komesara Carty-ja”, rekao je visoki predstavnik. “Izvještaj sasvim jasno ukazuje da je gospodin Andan ove tvrdnje iznio a da pri tome nije imao nikakvih čvrstih dokaza.”

Visoki predstavnik je naglasio kako su tvrdnje gospodina Andana političke prirode, i da su nanijele štetu ugledu instituciji Republike Srpske koju on predstavlja. “Ovim optužbama nanesena je ozbiljna šteta Bosni i Hercegovini, a posebno ugledu Republike Srpske. To je očigledan primjer uplitanja politike u policiju, a cilj reforme policije u BiH upravo je da spriječi takvo djelovanje.”

Visoki predstavnik zatražio je od gospodina Andana da do 6. juna uputi pismo komesaru Carty-ju u kojem će opovrgnuti izjave date na konferenciji za štampu, priznati da su pomenute

izjave bile neutemeljene i bez konkretnih dokaza, te obećati da u budućnosti neće davati politički motivirane izjave.

U izvještaju EUPM-a zaključeno je da gospodin Andan nije uspio potkrijepiti svoje tvrdnje bilo kakvim konkretnim dokazima.